



CONVENIO DE COLABORACIÓN ENTRE A CONSELLERÍA DE EDUCACIÓN, CIENCIA, UNIVERSIDADES E FORMACIÓN PROFESIONAL E A FUNDACIÓN GALICIA SUSTENTABLE PARA O DESENVOLVEMENTO DE ACTIVIDADES EDUCATIVAS NA SENDA LITORAL DE GALICIA

MEMORIA XUSTIFICATIVA

O secretario xeral técnico da Consellería de Educación, Ciencia, Universidades e Formación Profesional,

DECLARA:

Que a Consellería de Educación, Ciencia, Universidades e Formación Profesional formalizou coa Fundación Galicia Sustentable o instrumento convencional arriba referido por un período de vixencia que abrangue dende o día da súa sinatura ata o 31 de decembro de 2025.

Que o instrumento convencional ten por obxecto o establecemento das condicións para a colaboración entre a Consellería Educación, Ciencia, Universidades e Formación Profesional e a Fundación Galicia Sustentable para o desenvolvemento de actividades de concienciación ao alumnado sobre os servizos ecosistémicos a través de actividades educativas na Senda Litoral de Galicia, fomentando actitudes de coidado e corresponsabilidade co medio natural.

O proxecto desenvolverase nos centros educativos da Costa da Morte e estará dirixido a alumnas e alumnos de 1º de ESO dos seguintes concellos: A Laracha, Carballo, Malpica, Ponteceso, Cabana de Bergantiños, Laxe, Vimianzo, Camariñas, Muxía, Fisterra, Cee, Corcubión, Dumbría e Carnota

Son obxectivos específicos:

- Introducir o concepto de servizos ecosistémicos na ESO a través do contacto directo coa contorna.
- Vincular os novos eixes dos ODS post-2030 co currículo de forma activa.
- Desenvolver materiais didácticos e recursos dixitais con enfoque territorial.
- Estimular o pensamento crítico, a acción comunitaria e a alfabetización ecolóxica.
- Formar ao profesorado e apoiar a implementación nos centros educativos participantes.



- Crear un Observatorio da Sustentabilidade Escolar como ferramenta de seguimento e aprendizaxe colaborativa.

Que existe converxencia de intereses entre as entidades asinantes en orden á consecución do obxecto referido.

Que o instrumento convencional asinado fundamentase no seguinte:

Primeiro.- Que a Consellería de Educación, Ciencia, Universidades e Formación Profesional da Xunta de Galicia é o órgano superior da Administración xeral da Comunidade Autónoma de Galicia para a ordenación, planificación e execución das competencias en materia de ensinanzas de educación infantil, primaria, secundaria, bacharelato e formación profesional.

Segundo.- Que a Consellería de Educación, Ciencia, Universidades e Formación Profesional considera que un servizo educativo participativo e de calidade debe responder ás novas demandas sociais de modo eficaz, completando a oferta do ensino e fomentando as condicións de igualdade de oportunidades para a formación de toda a cidadanía. Nos tempos actuais a educación integral do alumnado demanda a colaboración de toda a comunidade educativa e outras institucións da sociedade para atender as aspiracións e necesidades do alumnado e familias, especialmente no que atinxe ao desenvolvemento de actividades extra curriculares. Neste senso, a Consellería entende importante concienciar á mocidade da necesidade de entender non só os impactos do cambio climático, senón tamén a importancia dos servizos que a natureza lles ofrece a diario: aire limpo, auga, alimentos, benestar emocional, paisaxe... a través de actividades educativas in situ.

Terceiro.- Que a Fundación Galicia Sustentable é unha fundación privada de interese galego, constituída o 26 de decembro de 2008 que ten como finalidade xeral o aproveitamento do potencial de Galicia e as súas xentes cara a sustentabilidade desenvolvendo os potenciais dos individuos e colectivos a través das súas accións, actividades e proxectos.

Cuarto.- Que o proxecto da "Senda Litoral de Galicia" foi deseñado e posto en marcha pola Fundación Galicia Sustentable. A Senda Litoral de Galicia configúrase como un itinerario de interese paisaxístico, en coherencia coa natureza e as funcións que lle outorgan as Directrices de Ordenación do Territorio e o Plan de ordenación do litoral (POL) e ten por obxecto fomentar o descubrimento do litoral, a valorización dos recursos territoriais e a lectura das paisaxes que se van percorrendo. Búscase, ao mesmo tempo, a conexión con outras rutas alternativas que percorren núcleos asentados na contorna do seu percorrido e que ofrecen un rico patrimonio cultural e etnográfico, moitas veces descoñecido ou esquecido.

Dentro dos obxectivos globais do proxecto figura a xeración dun modelo de xestión integrado que favoreza unha maior identificación da cidadanía residente co proxecto. Este modelo debe levarse a cabo en consonancia con axentes territoriais públicos e privados, realizando unha labor de difusión





e sensibilización entre a cidadanía con especial atención á comunidade educativa, o cal xustifica a necesidade deste convenio.

Quinto. Que a Consellería considera que o marco da "Senda Litoral de Galicia" é o escenario perfecto para vivenciar esta aprendizaxe, conectando o alumnado coa súa contorna mediante actividades reais, sensoriais e dixitais. Este proxecto busca transformar a relación co medio natural a través do coñecemento, a valoración e a acción, aliándose cos novos retos da Axenda Post-2030. Concienciar ao alumnado de 1º da ESO sobre os servizos ecosistémicos a través de actividades educativas na Senda Litoral de Galicia, fomentando actitudes de coidado e corresponsabilidade co medio natural.

As partes asinantes do convenio consideran axeitado colaborar nas actuacións obxecto do mesmo, por razóns de interese público e social. A singularidade do proxecto non fan posible promover a concorrência pública, dado que a Fundación Galicia Sustentable é, polo seu coñecemento, a única entidade existente en Galicia representativa deste sector con capacidade para desenvolver e executar o proxecto como entidade que deseñou a Senda Litoral de Galicia.

Que os intereses converxentes das partes asinantes exclúen o ánimo de lucro, e non poden satisfacerse axeitadamente mediante a celebración dun contrato dos contemplados na Lei 9/2017, do 8 de novembro, de contratos do sector público, pola que se transpoñen ao ordenamento xurídico español as Directivas do Parlamento Europeo e do Consello 2014/23/UE e 2014/24/UE, de 26 de febreiro de 2014, ou doutro instrumento alleo á natureza estritamente convencional.

En atención ao exposto, e a fin de dar cumprimento ao preceptuado no artigo 15.2. da Lei 1/2016, de 18 de xaneiro, de transparencia e bo goberno, estímase xustificado o recurso á sinatura deste instrumento convencional, con exclusión doutras figuras.

E para que conste, asínase esta memoria xustificativa, en Santiago de Compostela na data da sinatura electrónica.

O secretario xeral técnico,

Manuel Vila López

